

## **Dîs voltis dordei, ma no marionetis**

Un socialist che, tra une robe e chê altre al ven a tirâ une mesade che e fasarès gole a un biel grum di capitaliscj, nus à dât, a noaltris regjonaliscj, il titul di "ingenui". Par furlan cheste peraule si podarès voltâle cun tantis altris, dutis pitost sporcjutis: o sielzin, par rispiet la plui nete: dordei.

E, cu la nestre solite obietivitât, o disìn dal moment che al à reson. (No je la prime volte che i din reson!). Noaltris o sin dordei. Dordei, parcè che no vin mai leadis lis scarpis a un grant partît fin al moment di gaspâ une buine grepie, par voltai lis spalis l'indoman e jentrâ intun altri partît, indulà che par mancjance di esponents za in viste, la scjale di lâ in sù e je plui curte. Dordei, parcè che o vin molade une pidade a dute la retoriche de torce furlane, impiade su la scuretât barbariche oltrimontane: retoriche stupide e false, ma preziose e ben paiade dal Ufizi "Zone di Confine".

Dordei parcè che, plui di une volte o vin fat il cont dai vantaçs che il stât talian al à puartâts al Friûl dopo dal 1866, e lu vin cjatât disastrôs: miserie, emigrazion e forestarie; indulà che se o lu vessin cjatât positîf, si varessin vuadagnadis lis simpatiis di un grum di int "furbe". Dordei, parcè che o vin olsât criticâ la intuizion dai martars dal Risorziment tal imbastî il plui anacronistic ordenament statâl che al sedi stât metût adun tal secul passât; indulà che dal paron si à simpri di dî ben. Dordei, parcè che o si vin metûts a sostignî une cause che e cjate ogni dì avversaris plui rabiôs e risolûts tra lis gramulis plui formidabilis di Italie: une cause che no nus à puartâts, e no nus puartarà, su nissun scagn parlamentâr, in nissune presidence ben paiade, in nissune carriere politiche, in sumis a nissun risultât pal tacuin e pal budiel.

Dordei, parcè che no vin pleât il fîl de schene a nissune forme di adatament, a nissune voltade di bandiere, a nissun marcjât di principis, a nissun di chei cambiaments di gabane che ai "svelts" a puartin tancj vantaçs. Dordei, parcè che o crodin inmò, par cheste strade cence mangjadoriis, di podê fâ alc par chel biât Friûl, che par tancj altris al è nome une mangjatorie. Trê voltis, dîs voltis dordei. Ma no marionetis. Ma no tant dordei di crodi a une sole di chês peraulis di passion pe salvece dal Friûl, che i furbats di ogni partît a fasin stampâ sui gjornâi o che a ripetin intai comizis, par chê altre categorie di dordei che a votin par lôr: chei furbats che, dopo di vê scombatût par salvâ la Italie, par salvâ Vignesie, par salvâ Triest, a cjatin inmò flât di butâ par salvâ il Friûl.

(josef marchet- Patrie dal Friûl / 1950)